

## EXEGESIS.

**T**Ria in hoc articulo sunt observanda. I. *Quod qui abire vult, locum, quò se conferre destinavit, indicare teneatur.* Ubi iterum sequentia sunt consideranda. (1) *Posse quempiam ex justis causis absentem esse, uti studiorum gratia Auth. Habita. C. ne filius pro patre.* vel commerciorum causâ, vel ex alia quadam honesta causa. (2) *Si accusator post rei capturam ex honesta quadam causa secedere velit, prius teneatur Judici significare locum, ubi in posterum degere velit, modò locus iste sit commodus & tutus, ubi securè accedere, & recedere licet.* (3) *Causa denunciationis hujus desumitur potissimum à fine, qui est promotio Justitiæ, ne scilicet ob accusatoris absentiam Judicium reddatur elusorium: Igitur, ut illi ea, quæ postmodum ab incarcerato probantur & contra accusationem deducuntur, transmitti queant, nec non si opus fuerit, ipse citari debeat, Judex sciat, ubinam locorum degat accusator. Accedit & illa ratio, ne incarceratus ob absentiam latitantis accusatoris justo diutius teneatur in carcere subsistere. Cum itaque hominum occupationibus aliquid sit concedendum, & probabiles sæpe existant causæ, ob quas accusator cogatur abesse; ideò, si is præstiterit sufficientem cautionem, cum dicta cautela ipsi discessus ex isto loco permitti poterit.*

II. *Quod accusator, qui alibi locorum degit, teneatur nuncio acta, & citationes insinuanti, secundum cujuslibet loci & provincie consuetudinem mercedem solvere æquam. Æstimatur autem merces secundum numerum miliarium, ubi pro singulis miliaribus tantum solvitur, quantum è consuetudine & moribus regionis aut loci solvere oportet. Ratio autem, quare Actor mercedem solvere cogatur, est hæc, quoniam is, cujus gratiâ celebratur actus, sumtus præstare tenetur. l. ii. §. i. ff. ad exhib. Æquissimum itaque est, ut accusator solvat mercedem, utpote cujus interest, acta ad eum transferri.*

III. *Ut actuarius in actis judiciariis notet locum ab accusatore designatum; ut eò certius, quicquid postea in Judicio tractabitur, ei communicari, & si postea variet, actis convinci possit.*

ARTI-